



Tir Yimiyim

www.tiryimiyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimiyim@gmail.com

TAPAK 10 Yangia anidakangma : f Tir Yimiyim

Instagram tiryimiyim@aolima

YouTube tir yimiyim TAPAK 7



Wimbledon: Karolina semi-final-i iogo

Indian Army chief Gen Naravane-i UK semdang




VOL. XVIII NO. 263 (ADOK 263) DIMAPUR

RASEMNÜ (WEDNESDAY)

CHITENI (JULY) 07, 2021

₹ 5.00

COVID-19 Nagaland: 60 dak putet, 113 taneptsü angu, 4 asü



Kohima, July 6, 2021 (TYO):

Mongulbarnü Nagaland nung nisung 60 dak COVID-19 aliba putet, 113 taneptsü angu aser 4 asü.

"Tanü nisung 60 dak COVID-19 aliba putet. Parnokji Kohima nung 17, Dimapur nung 11, Phek nung 8, Mokochung nung 6, Wokha nung 5, Kiphire o Mon nung asemsem (3), Peren, Tuensang o Zunheboto nung anana (2) aser Longleng nung 1 lir. Parnok züngsema nisung ajak agi 25,619 kümogo" ta Integrated Disease Surveillance Project atema State Nodal Officer, Dr Nyanthung Kikon-i ashi.

"Maneni tanü nisung 113 taneptsü angu. Parnokji Kohima nung 46, Dimapur nung 27, Tuensang nung 17, Mokochung nung 14, Zunheboto nung 4, Peren o Wokha nung anana (2) aser Longleng nung 1 lir. Parnok züngsema taneptsü angur ajak agi 23,271 kümogo" ta paisa metetdaksü.

Tanü taneptsü angurtem dena Nagaland nung taneptsü angur 90.83% kümogo aser tang nisung 1,134 anepaludar, ta Dr Kikon-isa ashi.

Mongulbarnü COVID-19

Nija mozü kitem nung Covid agi shiranger manepalutsü

Dimapur, July 6, 2021 (TYO):

Nagaland sorkari May 5, 2021 nung nija mozü kitem nung Covid-19 agi shirangertem anepalutsü atema yipden 50% ayutsü tetuyuba ka agüja liasü saka Mongulbarnü iba tetuyubaji meyipa agiogo.

"Tanga osang ka magütsü tashi nija mozü kitem nung COVID-19 agi shirangertem anioka anepalutsü atema yipden 50% mekazüka ayutsü tutyuba

puteta alir nisung 4 asü. Parnokji Dimapur nung asem aser Wokha nung ka liasü. Parnok züngsema tasür ajak agi nisung 503 kümogo saka parnok 14 bo tanga tashidak ajanga asü ta paisa shisem.

"Nagaland nung COVID-19 alitsü akok ta temolung meleme bilemba sample 2,33,157 tendang. RT-PCR ajanga 98,597, TrueNat ajanga 62,769 aser Rapid Antigen Test ajanga 71,791 tendang" ta Dr Kikon-isa metetdaksü.

"Nisung 4,77,494 nem COVID-19 vaccine indang dose 5,49,458 agütsüogo" ta State Immunization Officer, Dr Ritu Thurr-ia ashi.

"Vaccine agirtem rongnung frontline workers 60,270, healthcare workers 15,826, arishi küm 45 ser temapur 1,57,622 aser arishi küm 18 nungi 44 tsüngda alir 2,43,776 lir" ta paisa ashi.

"Vaccine agir rongnung nisung 71,964-i dose anaprong agiogo. Parnokji frontline workers 29,581, healthcare workers 10,736, arishi küm 45 ser temapur 31,566 aser arishi küm 18 nungi 44 tsüngda alir 81 lir" ta Dr Thurr-isa metetdaksü.

agiena atar" ta state sorkari sangdong ka nung metetdaksü.

Mongulbarnü State-level Covid War Room nung senden amendang iba onük benoka jembia liasü.

Tang atema sorkari mozü kitem aser dedicated Covid hospitals nung yipden peria dang lir. Anungji, nija mozü kitem nung yipden balaka ayutsü nüngdak madoker, ta tanü senden nung telemtetba agi.

Tanü Union Cabinet ulushitsü: Lanur aika shimoktsü

New Delhi, July 6, 2021 (Agencies):

Prime Minister Narendra Modi-i pai aniba council of ministers nung nübo shimoktsü. Bodbar nikongdang 6:00 ako nung iba osang sangdongtsü.

Cabinet tasenba ya India putiotsü nung lanurtem teimba aliba asütsü ta sorkar osang ka ajanga ashi.

Cabinet tasenba nung lanur aika shimoktsü aser tetsür minister tem teimba asütsü. Maneni, OBCs (Other Backward Class) nungi nisung 20 tema anioxtsü. Kin aser telok tilatem nungi nisungtem anioxtsü sentong lir, ta osang ajanga metetdaksü.

Maneni, Union Cabinet tasenba nung PhDs, MBAs, post-graduates aser professionals aika shimoktsü, ta parnokisa ashi.

Hombarnü PM Modi-i Union Home Minister Amit Shah aser BJP general secretary (organisation) BL Santhosh na den Union cabinet ulushiba nung nisungtem shimoktsü indang senden ka amen.

Mongulbar nikongdang PM Modi-isa Amit Shah, BJP president JP Nadda, minister Rajnath Singh aser tangartem den senden ka amentsüba liasü saka athi.

May 2019 nung sorkar akümtsü atema tanaben tashi anguba sülen PM Modi-i tang mezüng atema council of ministers ulushitsü.

Osang angazükba agi Union Cabinet nung BJP lennir 6 minister inyaksü tezüngzüktep agitsü. Parnok rongnung Maharashtra nungi Narayan Rane, Madhya Pradesh nungi Jyotiraditya Scindia aser Assam nungi Sarbananda Sonowal nung dena lir.

BJP lennirtemi party MP tem aser taoba Assam Chief Minister Sarbananda Sonowal nung Delhi-i arutsü tetuyuba agütsüogo.

Iba nung ajemdaker taoba Assam chief minister Sonowal aser Rajya Sabha MP Jyotiraditya Scindia naprong Delhi tongogo.

PM Modi-i pa indang cabinet

nung minister 20 tashi anioxtsü akok ta osang angazükter.

Assembly election agitsü aliba Uttar Pradesh state aser ano Maharashtra o West Bengal ama state tulutem nungi nisungtem anioxtsü aser tang teinyakdak minister karibo menden toktsütsüsa akümtsü, ta osang ajanga ashi.

Cabinet ulushiba nung Janata Dal United-i Narendra Modi'er sorkar nung adentsü, ta JDU Bihar president Umesh Kushwaha-i osangbener dang ashi.

Ajisüaka, Kushwaha-i Cabinet ulushiba nung JDU nungi minister kwi shimoktsü'ar mashi.

Bihar Chief Minister Nitish Kumar-i dang Modi'er sorkar nung minister inyaksü atema JDU züngsemtem shimtsü ta paisa ashi.

STATE 8 NUNG GOVERNOR SHIM:

Union Cabinet ulushitsüba osang jembiba mapang ka nung India President Ram Nath Kovind-i Mongulbarnü state 8 nung Governor tem shimogo.

S.No.	Name	State
1.	Thawarchand Gehlot	Karnataka
2.	Bandaru Dattatreya	Haryana
3.	Hari Babu Kambhampati	Mizoram
4.	Mangubhai Chaganbhai Patel	Madhya Pradesh
5.	Rajendran Vishwanath Arlekar	Himachal Pradesh
6.	Ramesh Bais	Jharkhand
7.	Satyadev Narayan Arya	Tripura
8.	PS Sreedharan Pillai	Goa

DPDB Dimapur-i Niuland district akümtsü molunger

Dimapur, July 6, 2021 (TYO):

Dimapur District Planning and Development Board (DPDB)-i Niuland ADC subdivision nungi District balaka akümtsü molunga agizükogoo aser iba onük bangdakpur dangi abentsü lemtetogo.

Mongulbarnü Sericulture, Excise & Minority Affairs Advisor aser DPDB Dimapur Chairman, Zhaleo Rio menden ser DPDB senden amendang iba telemtetba ya agi.

"Niuland ya Dimapur district kübok lir aser rongsenkettsüng tsütsü renloka aotsü lenmang sadema lir" ta senden nung PHED Minister, Jacob Zhimomi-i ashi.

Iba onük jembidang Advisor Tovihito-ia "Niuland ya district ka akümtsü temsüa lir kechiyong sub-division tejentiba rongnung ka lir aser 1987 küm sub-division ka aküm" ta metetdaksü.

"Niuland sub division kübok

yimtsüng 109 den administrative circles 4 lir. Niuland indang tasazük ya 454 sq km lir aser kanga dang tongtipang tesem ka lir. Niuland-i Assam nung tongtipang jila ana den arrtsüa lir aser külen Nagaland nung state yimtiba den tanga district tem den arrtsüa lir" ta ADC Niuland, Athrila-ia district akümtsü pusema jembia.

Tanü senden nungsa Dimapur DC, Rajesh Soundararajan IAS-i public dang Covid inyakyim sülen anidaksü aser district nung Covid ajema akümba nung zübazülema malitsü ayongzük.

"Nagaland nung nisung teimtibai vaccine agibaji Dimapur district nung lir. Ajisüaka, onoki 100% vaccination alizüng yua lir" ta paisa ashi.

Senden nungsa CMO Dimapur-ia Covid-19 osang lemsatapa liasü.

"Dimapur district nung yipden 472 lir aser tang nisung 35 mozü kidang anepaludar aser home isolation nung nisung 267 lir" ta CMO-i ashi.

"New DC's complex nung lapok aliba CCC nung nisung 4 mongdar aser tanü tashi nung Dimapur nung COVID-19 puteta alir nisung 266 (tebur 186 aser tetsür 80) süogo" ta CMO-isa metetdaksü.

DIMAPUR NUNG PWDS ATEMA NODAL OFFICER SHIM:


Dimapur nung PWDS (persons with disabilities) indang grievances cell atema Nodal Officer shimogo.

"Tang nungi Deputy Commissioner, Dimapur office kübok EAC, Avonuo Kire-i Nodal Officer mapa inyaksü" ta Dimapur Deputy Commissioner, Rajesh Soundararajan-i tanü sangdong ka nung ashi.

Covid-19 tashidak nokdangtsü atema senso shia teinyaktsü asem :



Tangar alidak teti teni tebang nembanga mask temerük agiang;



Tangar den tsüktepa tenokdak aser temen;



Teti sapon agi teka metsükang.

Tekeratiba nung lenmang lapoktsütsüla: CVYS



Lenmang tiyong nung kisü-jensüba oset tem bendena ayuba aser mortar yangluba noksa ka yangi angur.

Dimapur, Chiteni/July 06 (TYO): Nagaland Police headquarters Chümoukedima ajanga ano maneni tim masüba yimya amshiba atema Chümoukedima Village Youth Society (CVYS) kanga jashir, ta sangdong ka ajanga ashi.

Nagaland Police headquarters Chümoukedima ajanga tim masüba nung tashi amshia nüburtem lenmang temeden nung aibenela ita ana dak tema RP Gate nungi Chümoukedima Village tashi lenmang ka shibangtsür dangaleni senzüdaksür, kong parnoki ki ka yanglutsü atema lenmang nung osettsüset nangdena ayur aser lenmang tiyong nung mortar yanglur, ta CVYS sangdong ajanga ashi.

Mezüngbo culvert ka yanglur ta bilema liasü aser ibayongji lenmang ya paidok südi ta bilem, saka kanga junga

asüngdangya nung, ibai ochimashi aser külakoktsüba mapa ka ta bushitet, aser iba mapa ya ajanga parnoki nüburtem züngshia maliba sayur, shirnoki akhi mapang nungi iba lenmang ya amshia aru.

RP Gate-Chümoukedima Village approach road ya Police Headquarters meyong masü, koba India nung nujiso mangudang aser Police Headquarter ya amenoktsü mapang talangka lia British Empire ajanga yangluba lir, ajisüaka Police Headquarter ajanga iba lenmang nung tenokdangba ajak agüja mapang shia nüburtem nem timtem agütsür, ta ashi.

Iba tebilemtsü ya Chümoukedima Village Council ajanga DIGP, Border and training, Nagaland Police dangi shidi-a zülüogo aser ano

nenshia shiogo, saka tejangja nüburtem tebilemtsü ya tang tashi terenlok mali, ta CVYS ajanga ashi.

Anungji CVYS ajanga Home Minister, Govt. of Nagaland aser DGP Nagaland dang tekeratiba nung iba tebilemtsü bentetratetsü mepishir.

Iba ama tensa adokdaksütsüsa inyakba atema CVYS ajanga khukhua aitsür aser tekeratiba nung lenmang ya lapokja traffic sadema senzüdaksütsü akhanger. Iba ken o tajunglen nungi mangatetepra, CVYS ajanga nüburtem ajungtsü mechi aser nüburtem senzütsü asoshi lenmang temeden agi melaba ama nungdakba mera tapet agitsüsa akumtsü, koba nung timtem adokra Police Department khuret asütsü, ta CVYS ajangasa ashi.

Zunheboto District Planning & Development Board senden menogo

Dimapur, Chiteni/July 06 (TYO): Zunheboto District Planning and Development Board (DPDB) pur ita shia amenba senden July 6, 2021 nü Town Hall, Zunheboto nung Advisor, Food and Civil Supplies, LMCP and Taxes, Pukhayi Sumi lenisüba kübok mena liasü.

Iba senden ya COVID-19 tashidak wara agi asür nem akum agüja mapang tatsüka süngjema lir tenzük. Iba mapang Advisor ajanga legislature, nübur lenirtem, sorkar tenzük aser dangartem iba virus agi asüba indang lemsatepa liasü.

Tashisak wara den raraba

nung lenla balala nungi yaritepba ajanga pai Deputy Commissioner, Zunheboto aser chairman DTF, Peter Lichamo aser DTF züngsemtem dang pelaba lemsatep aser maneni nübur asoshi inyaksü ayongzüka liasü.

Ajidang masü, frontline worker temi ammag-sangwa metitemi mapa inyakba atema pai pelaba lemsatepa liasü.

Advisor Pukhayi Sumi-i Agri aser sendaktepa aliba department tem dang nüburtem pei sasa pei poksünga alitsü atema aluyimer ajungmesotsü asoshi sentong balala yanglua

agitsü aser inyaksü asüngdanga liasü.

Nüburtem nungdakba peritsütsü asoshi sorkari tajungtiba nung meranger, saka kasa mapang nüburtemi pai sasa pei poksünga alitsü lenmang nung rangloksü mapang lir, ta pai ashi.

Iba senden nung Lotisa Old Village nung Government Primary School amenoktsü, St. Clare School, Akuluto atema grand-in-aid agütsütsü, Satami nung aliba Public Health Sub-Center ya PHC kumdaksütsü aser LADP 2021-22 indang jembia liasü.



Dimapur, Chiteni/July 06: All Nagaland College Students' Union (ANCSU) ketdangpurtemi July 6, 2021 nü College of Arts & Technology, Nerhe Phezha semdanga college ketdangsurtem den sensaksem kaa liasü aser iba mapang College ajanga college aser hostel nung admission angati agütsüba atema pelaba lemsatepa liasü. Ano maneni ANCSU ajanga danga college tem semdanga kaketshir aser college nung timtem balala ajuruba angateta nungdakba lenmang nung yariteptsü, ta ashi.

NSCN/GPRN (Reformation) ajanga Tuluni benjong salem abener nüburtemi jangratema chiyonga-ajemer. Iba benjong mapang sempet lemsateper aser kinunger adianutem tsüngta chiyongi jaokteper, ta ashi.

Tuluni ya Sumi kin atema benjong tongti ka lir, koba anogo asem tashi mungur July 8 nung tembanger. Tuluni benjong dang ya 'Anni' ta ajar, aser iba tetetzü talu-apoba mapang aser iba benjong nung

Sumi nungur ya temolung tulu aser tasü tait kin ka lir, aser tetsürtem akumtsüba amshir, aser Sumi kin nungi adianu aser adianutsürtem lenla ajak nung maneni wangshitsü imlar, ta NSCN (R) ajanga ashi

Peren DPDB senden nung Sakhi One Stop Centre indang jembi

Dimapur, Chiteni/July 06 (TYO): Peren District Planning & Development Board pur July ita atema senden ya Deputy Commissioner, Peren indang Conference Hall nung July 6, 2021 nü Deputy Commissioner, Peren-cum-DPDB Vice-Chairman, Sentiwapang Aier, NCS lenisüba kübok mena liasü.

Iba senden nung LADP 2021-22 kübok 6th Tening A/C atema scheme tem, St. Francis De Sales School, Peren atema grant-in-aid indang application temaba ketdangsur dangi yokba, Ahthibung Sub-Division kübok Songlüh nung St. Joseph School tasen lapoktsüba aser Peren Government College tesem melentsüba indang onüktem jembia liasü.

District nung Sakhi One Stop Centre, Peren ajanga inyakba mapa tem, scheme aser

nükjidong indang PowerPoint presentation tongmelang ka Counselor, Grace-i iba senden nung agütsü.

Sakhi One Stop Centre ajanga nüburtem tenzükba atema board züngsemtemi pelaba lemsatep aser tarutsü nunga akokba lenmang nung yariteptsü ashi.

Sorkar meyong office tem nung staff shilem 50 adentsü dak sendakba totuyuba ka Chief Secretary ajanga sangdongba indang senden nung züngsemtem dang Deputy Commissioner ajanga metetdaksü.

Officer aser staff aika mapai maruba indang pai süiki ia jembi aser parnok dang anepalua aser nendaka agüja mapa inuaksü ajungshia liasü.

Iba senden nung züngsem tasentem metetpelaba mapang agia liasü.

C-Edge College ajanga webinar sentong ka ayongzüka agi



Dimapur, Chiteni/July 06 (TYO): C-Edge College ajanga IBA (India Blockchain Alliance) aser AAMIDA Consulting Services den lungjemer July 05, 2021 nü Blockchain Technology indang webinar sentong ka agia liasü. Iba sentong nung IBA tentetsang aser chairman, Raj Kapoor shisalen sayur liasü.

Pai iba sentong nung Blockchain atema national strategy balala indang jembi. Alima nung blockchain 20 dak tema nung pa ya mentor ka ama lir, aser pai Blockchain technology ya discipline ajanga nungi kaketshir ajaki angazüktetsü, ta ashi.

Pai Blockchain indang tejangja rateta ashi aser iba technology poktetba indang shia liasü.

Kapoor ya taküm Asian Market Cap ajanga top crypto currency aser blockchain influencer ka ama shimteta lir, aser pai tarutsü career nung blockchain certification nungdaktsü indang kuli tenet agüja liasü.

Blockchain ya technology terenlok tsütsü tasenba lir, koba nüburtemi kanga bushir aser sector ajak nungi industry aika nung amshir, ta pai ashi. Iba webinar nung shisalen sayur aser shilem agir tsüngta sensaksemba mapang liasü.

C-Edge College ya IBA den MoU ka zülutepa lir, kong Blockchain Centre of Excellence amenoktsü, koba India Blockchain Alliance aser Dragonchain, USA ajanga yaritsü.

Manipur nung prangpong-injangtem aika ngutet



AR sepaitemi Manipur nung India-Myanmar arrtsü anasa prangpong-injang aika ngutetba noksa nung angur.

Imphal, July 6, 2021 (Agencies): Assam Rifles sepaitemi Manipur nung India-Myanmar arrtsü anasa prangpong-injang aika ngutetogo. Iba tesem ya Kamjong district nung liasü aser Smith and

Wesson M&PAR 15/22 ana den magazine 4, AK 47 rifle ka den magazine 2 & 210 rounds, M-16 rifle ka den magazine ka, grenade 2, 9mm pistol ka den 10 rounds aser detonator 8 ngutet. Kamjong district nung mapa

lemzuka aliba Chassad Battalion sepaitemi prangpong-injangtemji angu.

Prangpong-injang shibelenertemi Manipur nung India-Myanmar arrtsü adena mapa inyaker.

Arunachal Police-i mozü shibelenertem apu

Itanagar, July 6, 2021 (Agencies): Arunachal Police nung ozüing alema mozü shibelenba maparen anema inyaka aruba nung mozü shibelenertem tongti ka puogo.

Papum Pare (Rural) District Police-i Itanagar Capital Complex police den yaritepa mozü shibelenba maparen ka makdok aser tongti tetsür ka puogo.

Police-i government departmental driver ka densema nisung 5 apu.

Osang tejangja angazükba sülen police-i Gumto check gate nung gari (AR 01J 3990) ka soter mita repring. Gariji Kanubari nungi Itanagar

Capital Region-i arurba liasü. Parnoki gari mita repringang heroin ta temolung meleme bilemba packet 4 angu.

Mozü apuba sülen SP Dr Neelam Nega-i tuyuba nung ajemdaker Doimukh SDPO Bomken Basar aser Doimukh PS OC Inya Ete nati mezüing nisung ana apu.

Tenaji Department of Indigenous Affairs, GoAP driver Nima Wangchu aser cook Suraj Kengal na ta jangjaogo.

Suraj ya tongti süa tai tongloksür Yayi Lendo Jomoh'er kidang cook inyaker, ta SDPO-i ashi.

Jomoh-i tuyuba ama tenati Kanubari nung Rs 1 lakh yong mozüji alizük ta tenati nangzük.

Tenati heroin packet 4 nungi asem 6 Kilo tesem nung aser ka main supplier Yayi Lendo nem agütsüsüba liasü ta police dang ashi.

Iba osang nungji ajemdaker Itanagar aser Papum Pare külem police telok kati 6 Kilo tesem nungi Horjum Doke (Yayi Lendo Jomoh tenu), Takar Kabak aser Naren Chetry nungertem apu.

Parnoki Yayi Lendo'er ki mita aodang empty vials 184, injection ka, dummy pistols 2 aser injection, two dummy pistols angu, ta SDPO-isa ashi.

President Kovind-i Tripura aser Mizoram Governor tem shim

Guwahati, July 6, 2021 (Agencies): President Ram Nath Kovind-i Tripura aser Mizoram nung Governor tem shimogo.

Tanü President Kovind-i Governor inyaksü atema Tripura nung Satyadev Narayan Arya aser Mizoram nung Hari Babu Kambhupati shim.

Satyadev Narayan Arya-i Ramesh Bais nungi Tripura Governor melenzüksü. Bais ya Jharkhand Governor inyaksü shimshiogo.

Ramesh Bais-i July 29, 2019 nung Tripura Governor inyaksü tenzük aser Satyadev Narayan Arya ya August 25, 2018 nungi Haryana Governor inyaka aru.

President Kovind-i state 8 atema Governor tasentem shim. Maneni, Mizoram nung

Governor atema Andhra Pradesh nung taoba BJP state president Hari Babu Kambhupati shim. Pai P.S Sreedharan Pillai nungi mapa melenzüksü aser Pillai-i Goa Governor inyaksü.

President Kovind-isa Karnataka Governor inyaksü atema Union minister Thaawar Chand Gehlot shim.

Hari Babu Kambhupati is a former president of Andhra Pradesh BJP and a former Vishakapatnam MP.

Tripura chief minister Biplab Kumar Deb-i SN Arya den tepela osang lemsatepogo.

"Pa shisatsü aser lenisüba kübok state sorkari maneni state nung terenlok aser nütsüing yongsük lakh 27 azükarua alitsü atema inyaksü" ta Tripura chief minister Deb-i metetdaksü.



Health City Hospital-i Corporate Social Responsibility (CSR) activities nung shilem ka ama Mongulbarnü Guwahati Municipal Corporation (GMC) indang ketdangsür aser staff 150 nem N95 mask aser sanitiser lema agütsü. (Guwahati, July 6)

NGO-i Lakhimpur nem oxygen concentrator 27 agütsü

Lakhimpur, July 6, 2021 (Agencies): People's Action for Development (PAD)-i Action Aid India den yaritepa Lakhimpur district administration nem oxygen concentrator 27 agütsüogo.

Give India-i teyari agüja parnoki tanü Lakhimpur deputy commissioner Sumit Sattawan ket nung oxygen concentrators agütsü.

District nung Covid kanga puteter kechiyong nisung

aikati osang tejangja memetet aser ano aikati Covid tenokdangba sülen manidaker, ta PAD director Wilfred Topno-i ashi.

Iba mapang PAD Deputy Director Philipson Sona-i DC dang oxygen concentrator tem sayu.

PAD Documentation & Advocacy Manager Monoj Gogoi-ia DC dang parnok telok indang osang den Assam nung mapa inyaka aruba lemsatep.

Assam nung tanur 34,000 dak coronavirus putet

Guwahati, July 6, 2021 (Agencies): Assam nung tanur 36,000 shi ka dak COVID-19 putetogo ta Mongulbarnü health minister-i metetdaksü.

Tang tanur 2,890 tashi anepaludar aser June 30, 2021 tashi nung tanur 38 süogo, ta minister Keshab Mahanta-i ashi.

COVID-19 putetba tanur teimba ka dak tanga tashidak liasü, ta paisa ahsi.

COVID-19 wara tasembuba nung tanurtem dak kanga mejungi kongshitsü ta asüba kuli kecha mali, ta Lancet COVID-19 Commission India Task Force-ibo metetdaksü.

Ajüsüaka, wara tanabuba ya tanurtem atema kanga lendong

liasü aser iba ya mazüoktetra, wara tasembubaji tamajungtiba asütsü akok ta tsübua bilemer.

June 18 tashi nung Meghalaya nung arishi küm 14 teküpok aliba tanur 5,000 tema dak Covid-19 puteta liasü aser parnok 17 asü.

Assam nunga tanurtemi COVID-19 kanga menar aser karbo taküm samaogo.

"COVID-19 wara tanabuba shilem nung Gauhati Medical College and Hospital (GMCH) nung tanur 9 tashi süogo," ta superintendent Abhijeet Sharma-isa ashi.

"April 2021 nungi June 28 tashi mozü kidang tanur 135 tashi aniok aser parnok 9 asü" ta Dr. Sharma-isa metetdaksü.

GOVERNMENT OF NAGALAND
DIRECTORATE OF TECHNICAL EDUCATION
 Nagaland : Kohima - 797 004
 0370-2270409
 0370-2271432

NO.DTE/SCTE/6/2020-21/ Dated, Kohima the 6th July, 2021

NOTIFICATION

In continuation to this Office notification of even number Dated 22nd May, 2021, the last date for issued and submission of form for Diploma Engineering courses within the State for the session 2021-22 is hereby extended till 15th of July, 2021.

Sd/-
 (NUNGSANGMENLA IMCHEN)
 Ex-Officio Director

Issued by DIPR

GOVERNMENT OF NAGALAND
DIRECTORATE OF TECHNICAL EDUCATION
 NAGALAND: KOHIMA
 NO. DTE/ ESTT-2/02/2020-21/ Dt. Kohima, the July, 2021.

NOTIFICATION

In continuation to this office notification of even number Dated, 3rd April, 2021, it is to inform all the candidates who have applied for NSEE-2021, that the list of candidates (both hard copy and online/email submission) has been uploaded in the Department website: www.dtenagaland.org.in. Candidates are instructed to thoroughly cross check their details provided in the rows such as; Name, Fathers Name, DOB, course options, contact numbers etc.

In case of any discrepancies, candidates are informed to provide the correct details in the given format (available in website) and send it to this office via email; dtenagaland@gmail.com or before 10th July, 2021. After which, no correction or changes in any manners shall be entertained.

Sd/-
 (NUNGSANGMENLA IMCHEN)
 Ex-Officio Director

Issued by DIPR



TIR YIMYIM YIMOBILEM (EDITORIAL)

DIMAPUR RASEMNÜ, CHITENI (JULY) 07, 2021

Süngjangdong atemtsüla

Nagaland nung alir nübortem mapa inyaksü ajungshia rongsen kadaktsütsü merangba telok, Entrepreneurs Associate telok ajanga Pfutsero assembly constituency nungi adoksang, Planning & Co-Ordination minister, Neiba Kronu-i anir par lima nung süngjangdong atem tenzükba sentongji asenok ajaki ajizüka inyaksüba mapa tajung ka asütsü. Pfutsero ya Chakhesang nung lima, Phek district kübok lir. Tang tashi Nagaland nung parnok Chakhesang nungertem ya 'backward kintem' rongnung ka ta züngshir. Ajisüaka, tenüngji dang ashi, mapa ajak nung asenok 'forward' kintem dang nungi tajungba, temetetba aser takarba lir. Chakhesang lima nungbo parnok ayimba lu nungi parnok perir anünga züsentetter aser ak shia parnok metsüba (local) shi dang angutsü. Aji oda, Nagaland nung züsentetba aonsutsütem rongnung Pfutsero nung Chakhesang nungertem züsentetba aonsutsütemsa tanangba aser tajungba ta asenoki Kohima aser Dimapur nung alia achir. Par limaji temekong aser parnokji mapa nung temerang aser inyak tashi, anungji sütepsüteper. Aji oda, Nagaland nung 'forward' ta ajaba nisungtem sentsü agi tsübanger jenshia senzüdang, 'backward' lima nung alirtem parnok teka agi inyaktetba nungi aaba rongsen agi jangratema lia angur. Aji oda, tanübo backward ta ajaba kintem rongnung Konyak lima nung adokba süngo, Tuensang aser Kiphire nungi adokba kolar, Noklak nungi adokba apple, Peren aser Jalukie nungi adokba jang aser mersü, Phek nungi adokba aonsutsü aser süngjanglijangtem agi alima süngogo. Item jagi alima kintemi Nagaland ajungba indang meteta kümogo. Asenoka tenüngbo Takoba saka mapabo Tajungba ta asüba amato, parnok 'backward' purtemi inyakba mapa 'foaward' mapatemji ajizüka inyaksüla. Itemji kija ajungba agi masü saka yimsüsür lenirtem o nübortem na prongla kasasa tajung asüba agi lir. Lenirtemi pei lima aser nübortem dak apet mapa inyaksü sentong (idea) bener arua nübortem ajungshir aser nübortem aji tangar masü parnok ajangzüksü atema ta bilema jet ta angazüka inyaker. Aji oda, tang Pfutsero nung süngjangdong atemba sentongjia, state ajak nung inyakba sentong ka masü saka par MLA-ba ajanga Entrepreneurs Associate telok den shisalemsateper pei lima, pei nübor aser putu tensa dak apet nübortem rongsenren nung renlokaktsütsü asoshi süngjangdong meyrirjang 22 bener arua temdaktsüba sentong ka lir. Ibaji bilemdangra, mapa tasen ka masü aser tasaka masü saka asenoki meinyaker, iba jagi asen li tazüng, anungji jangponga aser senponga tazüng ta takar asütsüba agi peisasa sensaker kümer kazüteper. Atangji, asenokia süngdong atemer saka asenoki süngdong atemba o tang Pfutsero nung alirtemi süngdong atemba sentong aser inyakyimiji balala. Asenoki süngdong atembaji kisüjensüdang agitsü süngdong atemer aser süngjangdong atembaji kozülu teimba ayimer. Itemjia junger, saka kisüjensü dang agitsü süngdong aser kozüdong atemba mapaji ajaki inyaktetba masü, aji sensaker asoshi taginü memenep. Tang chipo nung süoktsü maka ser süngdonglu aser kozülu ayimtsübaji kanga tasak. Itemji takartem mapa. Ajisüaka, takar sensaker ta mali yimkong ajungkettsütsüba mapajibo ita ishika nung züsenteta ayoktsüba aonsutsü mesüra küm anasemka nung ongzüka ayoktsüba süngjanglijang lu ayimtsüba sentongjiang shisa taka mapa asütsü. Atangji, aonsutsü lu asüyonga, süngjanglu asüyonga ajaki yimnua alitsü saka nübortem aika ket nung aluyimdang chiyongtsü makaba agi kari teyari tilaka agüja majungshira, aikati mapa küma meinyaktetter. Iba tebilemstü repringteta, Pfutsero MLA-bai pa ajanga inyaksü lemsükba Local Area Development Fund nungi sen lakh ter agiteta süngjangdongtemji alir süngjanglu yimdaktsütsü tenzükogo. Item süngjangdongtem rongnung bingana dong, Avocado aser Yongchak dong amala yakta tejang danga achitsüla süngdongtem lir. Ano, tajung kaji item süngjangtemji kodang tangdir, itemji aluyimertem dang nungi Entrepreneurs Associate purtemi alizüksü, anungji aluyimertem asoshi tayokdak makaba tebilemstü malitsü. Tanü tensa Nagaland nung osang tajungji aji ka asütsü. Item mapatemji ajizüka asenok Forward lanurtemia süngjang lu ayimtsü, süngjanglijang ayoktsü aser süngjanglijang agi chiyongtsü tamen küma yanglutsüsa factory tilala lapoktsüba mapatem angazüka inyaksüla. Itemji mapa tasak masü. Government mapa nung ita sen meyrirjang ishika chia kilir mapa inyakba dang nungibo, pei lu aser pei mapa nung kibur küma inyakba tajangzük taliba aser aküm taketba lir. Aji oda, Forward pur yimsüsürtemia Backward pur yimsüsürtemi inyakba amaji, pei party apia development inyaksüba sen amajok nung angati lema magütsü, pei mapang nung yimdaktsüba lu nungi tejang danga nübortem anisüngzükba pei nuk agi angutsüsa inyaksü mepishir.

OLEMSABANG

ALIMA NUNG NUNGTUGO O JEMBIRTEM!!

~ S. Nuken Longkumer, Naga United, Dimapur

Tsüngremi sempet balala nisung shia nem agutsür! Item rongnung o jembiteter ya sempet tajungtiba lir!! tanü lima nung o jembir rongnungi tajungtiba John F. Kennedy U.S President soteta liasü ta ashir!! kodang pai telok nung jembitsü asoshi nokdakdir nupurtem kanga jangratemdaktsüba ya tesüngmangtsü ka liasü ta ashir!! Iba ama sempet tulu moatsüba taküm alimai nükshia liogo? Yamaji tanü putu nunga asen liner India lima nung Dr. Modi Prime Minister moatsüogo? Iba sempet yabo sen agi alitsü makok?? Iba ya teyanglur Tsüngremi pa tetsübok nung renemtsüba sempet rongnung tulutibaji India lima Modi asütsü!! tanü alima ajunga nung meimchir zünger mezüngma tashitemeteter liaka takartem liaka nü sempet alizüka jembitsü aser tontetsü ya tamakoktsü lir?? tanü nai jembiba o angashria mapang tatsüka kipong khurettem, alima khuret ajak anendaktsür?? Iba ama sempet tulu bener na yimsü asüba mapang ozü Naga lima belemtetang talisa ozü Naga lima asoshi tinyaktsü mapa aika lir!! saka onok asoshi car jajaba leman yabo onsara senti ama belemer!! Mezüng alima meimertemia junga dang inyaka aruogo?? Saka tanü putu car tali kümadoekr nisung dang nungibo cartem timba lir?? cari leman ya alima nung takartiba asü nung onoki kanga meimer!! Car leman jungra Naga nung aika takar akümstü onok nükla tulu lir!! na ama alima nung nungtugo India lima asoshi yokba nupu onokia nükshia repringer!! Tsüngremi nü chuba menden nung arishi talang India lima atema moajangma!! Dr. Modi nai jembiba angashira tongpangi (rarai) aotsü metsübur, wara mapang tsüba mepile? PM Modi ya India lima asoshi political philosopher soteta yutsüogo? Jai Hind.

N.B:-

Nok chira-a ayitsü atema longzük tajung nungdaker!! Itemji tanü alima mepongden sutepeba o jembiteter aser otzü zülurtem ya tongtipangtiba lir? parnok mejembi mesüra otzütemji mashinungbo Bazar amala nung sen agi altisü makok!! Anungji maneni dang inyaksü jembitsü, Naga lima teraksa aser ochimashi yimyatem, sensaker meyong aouyaba, meimchir temeden atema jembiba, car leman yangltusü sen agi R.C.C yanglua lira, Naga nungertem maneni bushitsüla?? Ochi o jemiba samaro nisung adoktsüla!! Nungtugo liner akümstü merangtsüla!! Tanü Naga nung azüngmeyaka ajeper??

COVID-19 ASOSHI TANG RENEMA AKABA NUNG ANO BENDENLOKTSÜ NÜNGDAKER.

~ Tiawapang Lkr, Mokokchung & S. T. Yapang Lkr. Kohima

Covid-19 anepalubaren tejangja metetsü asoshi RTI Initiative Nagaland tenüng nung RTI ACT 2005 nung ajemdaker Tiawapang Lkr pai RTI ACT 2005 dak ajemdaker IMDH Mokokchung Inspectionsüa liasü, iba ya nübur nungi osang balala angazükba agi repringdangtsüsa aküm, saka kodang item osangtem bendena temai adoktsüsa aküm takoksa ajurur kibongi parnok tenüngtem aser tatalokbatem temai madokdaktsünüba agi item osangtem melemsateper, saka ibaji teti asoshi tatem tabo masü, iba RTI telangzüba NO.MS-1/RTI/ESSTT/1/2011-12/314 dated 25th June 2021 nung ashiba agi tang IMDH Mokokchung nung Covid-19 agi shiranger asoshi yamai renema lir;

IMDH Mokokchung Covid 19 shiranger ayudak, tzü, mepung (oxygen), aser light peria aliba metetdaktsü, aserbo light marudang shirangertem ajak peritsüsa generator renema aliba parnok metetdaktsüogo. Shiranger kilem nung Jumbo Cylinder 67, B-Type Cylinder 146 (45 covid ward nung aser 19 hospital nung yua lir), Oxygen plant IMDH nung installed süa lir aser tang Oxygen concentrator 25 tamshidak lir. Tebushitetba ka; Asen lima covid 3rd wave arutsü tsübuseta aliba mapang district Hospital ka nung ICU 4, Ventilator 4 aser Oxymeter 15 dang renemba sayur, anungji item ocet talila bendenloktsü memenui nüburtemi ola adoktsüla.

Kasa RTI telangzüba nungisa Covid-19 wara arur iba RTI langzüba anogo tashi nung Covid-19 dak sentakba maparen asoshi IMDHMokokchung nem sen lakh 2,55,080/- (Rupees Two lakh Fifty Five Thousand & Eighty) only dang lemsüktsüba yabo kanga ajema lemsüktsüogo. Ajasünung asenok nüburtemia ola adokdi, corona asoshi sen ya district hospital ka nem küm ka nung 50 lakhs, CHC ka nem 10 lakhs, PHC ka nem 3 Lakhs, aser Sub-Center ka nem 1 lakhs ta agütsütsü rongshitsü tim. Mozüki asoshi senotsü marur masü, anungji District Hospital ka nung teti asoshi ICU 10 den Ventilator 10, CHC ka nung ICU 5 ventilator-3 tabo yangluloktsü Govt. dang meshidi.

Tang Nagaland nung akaba mozükitem ya center sorkari yokba den ala majemba repringteter, kechiyong 2018-19 aser 2019-20 küm ana nung Ministry of Health & Family Welfare nungi asen Nagaland asoshi sen 1,778 core (One thousand seven hundred seventy eight corer) shi schemes aser progammes balala asoshi sanction sütsüba ngua kanga süngmanga bilemogo, anungji item sen aser ano tanü tashi Covid-19 asoshi arubatem kanga junga repangshitsü.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Pakistan nung tamanger ana tasüba temerenshi nungi jenbu



Shafqat Emmanuel aser pa kinungtsü Shagufta Masih na noksa nung angur.

Lahore, Chiteni/July 06 (Agencies): Pakistan kübok Lahore High Court ajanga Catholic tsür ka aser pa kinungbu medenja obendang agütsüogo, shirnoki tamangba yimsü mezügmeshia text message yokba ken o nung court tilaba kati aija küm tenet iba ken o jembia arua liasü.

Pakistan indang Punjab Province kübok Toba Tek Singh district nung aliba Gojra area nung school ka nung watchman inyaksang Shafqat Emmanuel aser pa kinungtsü Shagufta Masih nay a session court ajanga tasüba temerenshi agütsütsü obendang agütsür hopta ishika lir high court ajanga taoba hopta obendang agütsüba nung ken o junga mejembiba atema temolung masüba shia liasü, ta The News International ajanga ashi.

Catholic nung apuani ana ya Pakistan indang blasphemy laws kübok 2013 küm July ita pua liasü aser session court ajanga tena süngzü agi alenseta südaktsütsü atema 2014 küm obendang agütsü.

"Tashitemetet additional sessions judge ajanga junga anepalu masüba yimya amshia ken o nung telemtetba agiba atema onok süngmanger... Ken o jembishitsü benoker medentsür," ta obendangba nung shia lir.

"Iba ken o ajanga Pakistan indang blasphemy laws

meshidaki amshiba sayur," ta Tehmina Arora, director of Advocacy, Asia, for ADF International ajanga sayur.

Tena nem temeden agütsüba ya Pakistan nung tamangba yimsü temeden tsütsü mera tajung ka lir, ta Arora ajanga ashi.

"Iba ya ajanga tarütsü nung tamangba yimsü dak sendakba ken o nung kuli tejangja bushitsüla ta sayuteter," ta lai ashi.

"Item kuli tejangja makaba ken o nungi temeden anguba ajanga Shagufta aser Shafqat na temolung anisüngzükogo," ta tena indang okatsür Saif Ul Malook-i ashi.

"Ken o jembiba nung aiben menuba ajanga parnok timtem jenti ajuruogo. Security mechi item ken o ya okadaki abentsü kanga tasak. Metdong aser okatsür takum nung lendong tulu lir," ta pai ashi.

Masih ya Asia Bibi ayuba tepuokdak yua liasü, shiba Islam yimsü mezügmeshiba ken o nung tasüba temerenshi agütsütsü obendang agütsür küm ti tashi atsütepa arur 2018 küm temeden ngua liasü.

April 29 nü European Parliament ajanga Pakistan ketdangsur dang Shafqat Emmanuel aser Shagufta Masih tekeratiba nung chioka tasüba temerenshi melenshitsü atema pangzüng ka yangluba sülen tena indang ken o ya agizüka jembishia liasü.

Tena yagi parnok aliba

tesem nung Muslim nung putir ka dangi 2013 küm tamangba yimsü mezügmeshia text message yok, ta tai tongloksü.

Emmanuel-i pa kinungtsü indang cellphone amshia Islam yimsü anemba text message yok, ta yangji aliba mosque nung lenir Maulvi Mohammed Hussain-i aitsü. Iba sülen ano danga message tem yok, ta pai ashi. Hussain-i ashiba agi, pa sarasademba mapang mejangjaba number ka nungi text message ya aru.

Muslim putir yagi text message ya imam danga ana dang sayu aser ken o benok. Pa aser pa indang okatsüri tamangba yimsü mezügmeshiba message ya tenaprong dangi aru, ta ashi.

Masih tenu Joseph-i taoba mapang BBC dang pa teyi kinungbu ya reshikangshia amshi aser tiazü nangzükdaksü, ta shia liasü.

Text message ya English agi zülua liasü, ta tai tongloksü. Shafqat aser Shagufta na ya mazüng-mashi aser tenati English oshi zülutsü mesüra jembitsü memetet.

Phone ya Masih tenüng nung süaka mangatetep adoka aliba kidanger Khristan kati SIM card ya Masih tenüng nung alia message ya yok alitsü, ta Malook-i ashi.

Pakistan nung Islam yimsü wazüka ayutsü atema yangluba blasphemy laws aser iba yimsü akhanga amangertemi mapang shia Khristanpur dak tenük yoker, aser nisunga aika tepsetogo.

Pakistan Penal Code indang Section 295 aser 298 nung shia aliba blasphemy law ya pei ajanzüktsü mechi aiben tim masüba nung amshir. Iba ken o nung kuli tai agütsür merenshitsü kecha shia mali.

Islam yimsü akhanga amshirtemi tamangba yimsü tsütsü kin tilatem - Khristan, Shias, Ahmadiyyas aser Hindu nung dak tenük yoker iba ozüng ya amshir.

ANO GO ABEN TSÜNGREM DEN

Ne mulungjang mitang

Ne mulungjang kanga nendaka mitang; kechiyong iba nungi taküm tzüpokdak adoker. A. Shin 4:23

Asen mulungjangi asen kolok dang ashir aser tebilemba aser tim shisatsü kuli asüba teyongtsü lir. Ibai asen tejangraba (emotion) aser temulungtetba dena lir aser ibai asen taküm telung ajunga lir. Asen mulungjangji shisatsü ajak rizüngdak lir aser aseni jembiba, anguba aser mapa ajak adokdak. Asen mulungjang mita alitsü Solomoni ashir. Anungji ibai koda inyaksü tekong 24-27 nungi telangzüba agütsür. Shisatsüji anasa yuang. Tsüngrem O nung temulung agüjang aser ibaji temulung nung yuang. Asen mulungjang nung kechi ayutsüla Pauli ashir - ochi, akhümtsübu, temeten, temerük, temeimtsü aser yamala (Fil. 4:8).

Tanü asenoki ibaji koda ataloktsütsü akok ? Asenoki tajungji ayutsüla aser tamajungji endoktsüla. Asenoki kümdangtsü - asenoki kümdanga angazüktsüla. Iba nung noksa, TV aser asenoki shirnok den mapang endoker, ajak dena lir. Asen mulungjang nung kechi ayutsüla Dawidi ashir, "Ni Ne O kü mulung nung rizünga ayu" (T. Ken 119:11). Asenoki anogo shia Tsüngrem O nung mapang entoktsübaji mezüngbuba südaktsüra, aser anogo shia sarasadem nung Pa den mapang entokra asenoki asen mulungjang anogo tepiyong sütepa anüker.

Oh ! kü Tsüngrem aser Oba, Nai ni shimtet aser kü den jajaba agi ni kanga moatsügo. Tanü ni koba ochi aser akhüm tsübutsü lir item nung temulung agütsütsü yariang. Amen.

Pope Francis temang junga lir, mozüki nung anogo 7 amungtsü

Vatican City, Chiteni/July 06

(Agencies): Pope Francis tar tazüng nung timtem adokba ajanga surgery agiba sülen Hombarnü temang tajungba liasü, saka pa anogo tenet mozü kidang amungtsü, ta Vatican ajanga sangdong ka nung ashi.

Arishi küm 84 tain putir ya tar nung operation agitsü atema Rome nung aliba Gemelli hospital-i Deobarnü anir ao.

Francis temang junga, saksalema lir aser tango tanen makai sashir, aser pa dak surgery ya ghonda asem shi agi, ta odongtar Matteo Bruni-i sangdong ka nung ashi.

"Mozü kidang anogo tenet shi amungtsü imlar," ta pai ashi.

Hopta ka tejaklen Saint Peter aser Saint Paul benjong mapang Francis-i pa operation agitsü indang amsema jembir ama liasü, kong pai "Pope atema sarasademtsü ni nenok dang asüngdang, yimya balaka nung sarasademjang. Pope-i nenok sarasadem nungdaker," ta shia liasü.

Pai Bodhbarnü nüburtem den ajurutsü sentong soita lir aser Deobarnü tashi pa sentong kecha nunga shilem agitsü yanglua mali, kong pai Angelus sarasadem anitsü lir.

Italy Ato Kilonser Mario

Draghi-i Francis tekeraba nung taneptsü ngudakjang ta sarasademtsür, ta Hombarnü ashi.

Alima nung Muslim nung rongnung lenir, Sheikh Ahmed el Tayyeb, Grand Imam of Al-Azhar ajanga putir tekeraba nung taneptsü ngudakjang, ta ashi.

Pope John Paul II amungdang amshiba takdang kasa nung Francis ya munga lir.

Asür Pope John Paul II ya iba Gemelli mozü kidang tenetben surgery agia liasü.

Iba takdang nungya yipten ka, television aser metzü meshiba tesem ka, sitting-room ka nung sofa yipten ka aser sarasademba langpang tilaka lir, ta osang ajanga ashir.

Iba mozüki ya Italian aser Vatican police temi anüker.

Iba mozü kidang John Paul II aiben oa among, anungji pai iba mozüki takdang dangya "Vatican 3" ta nungja agütsü.

Putir ya iba mozü kidangi nikongdang pa indang driver aser teyariteper kati meina aru, ta ashir.

Argentina nung 1936 küm December 17 nü asosang Francis ya arishi küm 21 asüdang tepokpok achichilen shilem kar raksa.



Ambari, Guwahati nung aliba Stanislaus Lourduwamy atema nüburtemi sarasademtsüba nung Khristanpuri shilem agiba noksa nung angur.

OLONG PAITEP # 5867

	1				2			3		4
5								6		
7			8							
								9		
		10								
11										12
					13					
					14					
15										
					16					

TIPLÉN		LANGTSÜNGLEN	
1. Balaka	- (5)	2. Hai sür inyak	- (4)
6. Aika shirangba	- (4)	3. Aor tenüng ka	- (6)
7. Tar tatsü	- (6)	4. Ali telungi talangka lur	- (5)
9. Nenü'er jabaso	- (4)	5. Tebang kenyongi mazüoker	- (4)
10. Sen latettsüba	- (7)	8. Ken atema anenzükertem	- (5)
11. Tangar kübok alir	- (4)	9. Toktepa noktak	- (5)
14. Lon nung inokba	- (6)	10. Sen	- (6)
15. Tzü ayimdak	- (4)	11. Benjong agi	- (5)
16. Ajok	- (5)	12. Telung nung rizünga ayu	- (4)
		13. Tebang nung enok	- (4)

OLONG PAITEP # 5866 TELANGZÜBA

TIPLÉN :		LANGTSÜNGLEN :	
1. Aben, 4. Artsü, 7. Lisem, 8. Liwa,		1. Aruli, 3. Balala, 5.Suwar, 6. Belem,	
9. Sarasadem, 12. Aket, 14. Mangu,		9. Sүjak, 10.Aonung, 11. Dokan,	
15. Anünü, 16. Ango.		13. Tinu.	

YABO MELENSHIDI NI

YA SHIBA TAI BUSHIDANGTI

Ratartem : Hai ya kechiba ISRAEL o PALESTINE nunger ya parnok ajak ABRAHAM chir aser semchirtem sür nung kechiba yamai raratepa dang alir ya?

Langzür : Ya kecha ratatsü mali tambuji ano ABRAM ta dang ja-a aliba mapang Kanan lima küm ter lir, SARAI, ABRAM, ni tanur masotsü, anungji kilitsür HAGAR pa nem tebuttsü asütsü bendanga agütsü. Anungji HAGAR ajanga ISHMEEL aso aji ABRAM tena chir. Aji sür ABRAM o SARAI naprongla Tsüngreme tenüng melentsü ABRAHAM, SARA. Aser ISAK aso. ISHMAEL aser ISAK tenaprong ABRAHAM chir, saka Tsüngreme tenüng memelentsüdang asobaji masü, saka tenaprong tenüng melener asoba jabasoji dang shidakba Tsüngrem metsü ta ajar ati. Kodang shimatsü nenoki Lipok 16, 17 ji zügang yangji ajak angatetja no. Saka ya Sarai tai ajanga.

Ratartem : Süra ano ya ratetjangno. Kechiba tanü asüng tanur tilatem ya aonung menua memejanger, aser anepdang 11, 12 paji nungang teimba saker ya?

Langzür : Aji kecha ratatsü mali. INA tanü tensa mobile putu arur ya tongtipangsa parnok aier asangurtem ya mobile nung tajung majung ajak repranga kazüdang sangwadaktsür. Iba jagi parnok kibong kümer asoba tanurtemji itum shi azü jagi yangluba asü agi parnok mesüka yakta memejanger dang. Yangji kinü tanurtem kecha tai mali nenok tejashi no nenok shiazü agi yanglubaji nenok yimya mesüksü.

- N. Saku Imsong, 4th Mile, Diphupar.

AO OSHI ANGAZÜKDAK:

TANÜ ANGAZÜKTSÜBA OJANG

Keyi

(n) shi chia taküm aliba arem shiruru tapu ka. Nisung kar dakbo iba shiruru tanela alir. (tiger)

* **Keyi** kati ozü nashi ngosettsü.

Küyi

(n) tanutsü tanubotemi tantsüla dang ajaba (elder sister)

* **Küyi** aser künü nungertem ajaki ni meimer.



Tir Yimym

NAI-A YA METETTER MA?

ASSAM NUNG TEMOKTEMNÜBA TESEM KAR:

"Haunted Lounge, Jorhat"

:Angazükba agi, tesemdanger temi iba lounge nung külem-küjaba temaitsü mesüra mojing temaitsü balala aliba angu aser aonung asükjang merongtsüsa nisung arongba aser ola balala agi temoktemnür. Iba lounge ana meta alirtemi ashiba agi, menendokba kidang (lounge)



Haunted Lounge, Jorhat

nungi nisung ajepba, ola balala aser nisung arongba ola tem angashir. Nisungtemi iba kilung tesem balala nung temaitsü balala anguba kuli agütsüogo. Item temaitsü ya temenen tanela aser mojing den sendaktepa lir ama bilemer. Anü lür sülenbo, nisung shingaia iba kidang tetsüng ajemoktsü temolung muluteter.

(Maneni asüng adok nung...)

TANÜBO NAI LANGZÜANG

Q. OECD (Organisation for Economic Co-operation and Development) indang headquarters kong lir?

- A. Paris
- B. London
- C. Berlin
- D. Italy

=====(Taruba adok nung onoki langzүtsü)

YASHI ADOK TELANGZÜBA : July 1st, 2015

SUDOKU # 5907

TELANGZUBA # 5906

	5		4	3					1	7	4	9	6	2	5	3	8	
1		4	8	6				2		9	6	2	8	3	5	1	7	4
	3						4	8		5	8	3	4	1	7	9	6	2
4		2		5	8					3	1	7	5	2	8	4	9	6
5			3	9		4	8	6		4	5	6	1	7	9	2	8	3
6		3			4	2		5		8	2	9	3	4	6	7	5	1
	6		7	2	1					2	3	8	7	5	1	6	4	9
7	2	9		4	3					6	4	5	2	9	3	8	1	7
	4		9	8		5		7		7	9	1	6	8	4	3	2	5

OJANG LUTEP # 5452

EPANDANG :

YTAKA :

AKSAA :

YAKINER :

MITE :

SÜNROEKENGSTTG :

ÜBNDKZÜITSA :

NGNU :

ILESHM :

IRAG :

OJANG LUTEP TELANGZÜBA # 5451

**LENDONG AJURUTSÜ TSÜBUBA AGI SHIRURU TEPSETA
TARONGBA TENLA AGÜJA KÜPTOK**

TAN HOPTA ATEMA - KOMA SÜLA ?

Q. Nagaland nung Naga nungerbo kibong nung tanur ajema asotsü atema masü aika asotsüang ajungshitep nung koma süla ?



Birbhum district kübok Suri nung totzü jenjang ajungketba atema longkak aitba mapang Socialist Unity Centre of India (SUCI) activist kati LPG gas cylinder noksa ka rongtokba yangi angur.

Delhi sorkari Covid agi kongshir aliba kibongtem nem teyari agütsütsü

New Delhi, Chiteni/July 6 (Agencies): Delhi Chief Minister Arvind Kejriwal Mongolbarnü, Covid-19 tashidak agi taküm samara aliba kibongtem nem senotsü teyari agütsütsü atema scheme ka aser online portal ka amenoktsüogo aser ketdangsürtem dang parnoki benokba application nung tai maputsü metetdaksüogo. 'Mukhyamantri Covid-19 Pariwar Aarthik Sahayata Yojana' kübok Covid-19 tashidak agi taküm samara aliba kibongtem ajak nem 50,000 ex gratia agütsütsü aser tashidak

agi asisang/la ya kibong mesür ka süra ita shia sen 2,500 agütsütsü. Virtual press conference ka nung shilem agiba mapang Kejriwal-i, Delhi nung Covid-19 wave pezübuba agi kibong timba ka dak kongshiogo aser nisung aika süogo, ta ashi. "Tanurtem aika lajar kümogo kibong aika nung kibong mesür süogo. Iba amala mapang ka nung khuret abenba sorkar ka ama onoki iba scheme benoktsü asatet," ta pai ashi. "Onoki portal ka amenokogo aser iba ajanga nüburtemi senotsü teyari atem apply

sütettsü. Onok tenüing nung ketdangsürtemi iba amala kibongtem semdangtsü aser application renemtsütsü," ta pai ashi. Chief minister-isa item ketdangsürtem yagi document kar mabensa ali nunga aibelen maputsü aser inyakyim nung teyari agütsütsü. "Item ketdangsürtem ya application tem asadangtsü atema masü. Kibongtem kar nung kuli kaket kar agi meperi lira onoki item kuli kakettem agizüktsü atema teyari agütsütsü. Iba sentong takok atema inyaksüla. (Maneni tapak 10 nung...)

Indian Army chief Gen Naravane-i UK semdang

New Delhi, Chiteni/July 6 (Agencies): Chief of Army Staff Gen M M Naravane-i Mongolbarnü Chief of General Staff of British Army General Sir Mark Carleton-Smith den ajurutepa military tesendaktep dak sendakba nung sensaksem kaogo," ta ADG PI-i tweet asüba den senden nung tangokba noksa kar lemsatepa liasü. Hombarnü Gen Naravane-i, UK Chief of Defence Staff Gen Sir Nicholas Carter den ajurutep aser linük ana tsüingda defence tesendaktep atema pei tebilemdangba lemsatepa liasü. Gen Naravane-i, Grenadier Guards on Horse Guards' Parade Square nung pa atema ayongzüktsüba Guard of

Honour asadanga liasü. Kasa mapang nung Gen Naravane-i, UK Secretary of State for Defence Ben Wallace dena ajuruteptsü. Europe semdangba mapang Bodhbar aser Brehostibarnü Gen Naravane-i, Italian Army Chief of Defence Staff aser Chief of Staff den tongtibang sensaksem akatsü. "Iba den bendenloksema Chief of Army Staff-i, Cassino jila nung Indian Army Memorial lapoktsütsü aser Cecchignola, Rome nung Italian Army, Counter IED Centre of Excellence semdangtsü," ta Indian Army sangdong ka ajanga metetdaksü.

July 22 nü nungi Parliament kima longkak aittsü aluyimertem renemer



Syama Prasad Mookerjee asoba anogo New Delhi nung Union Defence Minister Rajnath Singh aser MoS Finance Anurag Thakur flag nati Himachal Pradesh atema oxygen concentrators 900, mask lakh 1 aser PPE kits 3500 bener aliba tata gari tenzüktsüba noksa nung angur .

Union minister Thawarchand Gehlot Karnataka Angh asütsü shim

New Delhi, Chiteni/July 6 (Agencies): Karnataka Angh asütsü shimba sülen Union minister Thawarchand Gehlot-i Mongolbarnü, pai temzüing ozüing kübok aser sensaksem ajanga ken o ajak bentettsü merangtsü ta ashi. "Kü dak imlaba ama alitsü merangtsü aser kü mapa ochishia bendanga inyaksü. Ni ken o tem ajak sensaksem aser temzüing ozüing kübok bentettsü merangtsü," ta Thawarchand Gehlot-i ashi. "Ni Rajya Sabha MP aser Union minister of social justice and empowerment densema mapa asemprongla nungi anentsü atema asüing tsüingdong oa resignation

agütsütsü," ta Gehlot-i ashi. Arishi küm 73 tain Madhya Pradesh nungi Rajya Sabha züingsem Gehlot ya tir Ram Nath Kovind-i shimba Angh tasen ti rongnung ka lir, ta Rashtrapati Bhavan sangdong ka ajanga Mongolbarnü metetdaksü. Vajubhai Vala melena Karnataka Angh asütsü Thawarchand Gehlot Mongolbarnü shimogo. Gujarat nungi BJP lenir Mangubhai Chhaganbhai Patel-i Madhya Pradesh Angh mapa belenzüktsü. Uttar Pradesh Angh Anandiben Patel-i Madhya Pradesh Angh mapa dena bener liasü. (Maneni tapak 10 nung...)



Bhopal, Government Hamidia hospital nung nurse temi parnok itasen ajungkettsütsü khanga longkak aiba noksa nung angur.

July 22 nü nungi Parliament kima longkak aittsü aluyimertem renemer

New Delhi, Chiteni/July 6 (Agencies): Aluyimba ozüing asem anema longkak aitba aluyimertemi July 22 nü nungi tenzüka Parliament kima longkak aittsü. Taoba küm yangluba ozüing agindaksütsü atema sorkar nongshitsü nükjidong nung iba sentong ayongzükgo. Longkak aitba sentong tem asendenshir tenzükshitsü aser state balala nungi aluyimertem senzüsenpong achaayangtsü atema aluyimba lokti tentettem mapang aika indoka senden mena arudar. Samyukt Kisan Morcha sangdong ka ajanga ashiba agi, monsoon session nung anogoshia aluyimertem 200 shi-i Parliament kima longkak aittsü. Samyukt Kisan Morcha-isa, aluyimba lokti tentettem aser mulung ajemba teloktem longjemer totzü jenjang ajungketba anema July 8 nü longkak aittsü, ta metetdaksüogo. July 19 nü nungi Parliament monsoon session tenzüktsü. Farm unions-isa, Parliament session tepeyong aluyimba ozüing asem indang ken o benoktsü atema mepeshitsü asoshi parnoki yakta Opposition party aser MP ajak dangi shiti yoktsü, ta ashi.

Aluyimertem pei tractor bener linük yimtiba July 21 nikongtsütsü adenshitsu imlar. Longkak aitba tesem nung nüburtem anenzüktsü atema anepaluogo. Delhi arrtsü nung Singhu, Ghaziabad, Tikri, Dhansa and Shahjahanpur (Rajasthan-Haryana arrtsü) tesem nung aluyimertemi süki süzüka yur longkak aita arudar. Aluyimertemi Tikri-i arurtem anenzüktsü atema permanent weather-proof shelter ya yangluogo, ta Bharatiya Kisan Union züingsem Dharmendra Singh-i ashi. Aluyimertem Parliament-i aotsü sentong yanglur aliba ya police temi sottsü tejangja, kechiyong Parliament anasa longkak aittsü memelar anungji iba ajanga mangatetep adoktsü akok. Punjab, Rajasthan, Haryana aser Uttar Pradesh nungi aluyimertemi aika tang longkak aitba tesem tonga aruogo. Uttar Pradesh kübok Pilibhit nungia aluyimertem aika aruogo, ta Singh-i ashi. Aluyimertemi aluyimba ozüing asem ya agindaksüner. Parnoki ashiba agi, item ozüingtem ajanga parnok takartem kabuma nung toktsütsü aser parnok libaliro raksatsü.

Delhi arrtsü nung Singhu, Ghaziabad, Tikri, Dhansa and Shahjahanpur (Rajasthan-Haryana arrtsü) tesem nung aluyimertemi süki süzüka yur longkak aita arudar. Aluyimertemi Tikri-i arurtem anenzüktsü atema permanent weather-proof shelter ya yangluogo, ta Bharatiya Kisan Union züingsem Dharmendra Singh-i ashi. Aluyimertem Parliament-i aotsü sentong yanglur aliba ya police temi sottsü tejangja, kechiyong Parliament anasa longkak aittsü memelar anungji iba ajanga mangatetep adoktsü akok. Punjab, Rajasthan, Haryana aser Uttar Pradesh nungi aluyimertemi aika tang longkak aitba tesem tonga aruogo. Uttar Pradesh kübok Pilibhit nungia aluyimertem aika aruogo, ta Singh-i ashi. Aluyimertemi aluyimba ozüing asem ya agindaksüner. Parnoki ashiba agi, item ozüingtem ajanga parnok takartem kabuma nung toktsütsü aser parnok libaliro raksatsü.



Samut Prakan, Thailand nung Firefighters temi rongtoker aliba chemical factory ka nung poja (foam) khaloktsüba noksa nung angur. Factory nung mi adokba sülen ghonda 24 dak tema lir Firefighters temi mi temsepogo. Factory nungi miim aketba mozü adokba ajanga iba tesem temeket nung alirtem anintsüsa aküm.

Russia nung tayimtsü ka tsükok; nisung ka danga mekümzük

Moscow, Chiteni/July 6 (Agencies): Mongolbar anepdang Russia anüdoklen tip nung An-26 tayimtsü ka nung nisung 28 mener tsükok. Tayimtsüng tsükokba lendong nung nisung ka danga mekümzük, ta Reuters-i metetdaksü.

Russia kübok Eastern Kamchatka peninsula nung Mongolbar anepdang An-26 passenger tayimtsü ka nung nisung 28 mener samaba search team temi ngutetogo, ta linük aviation agency-i AFP dang ashi.

"Tekümzükertemi tayimtsü teraksa ngutetogo. Alinük kanga majungba ajanga tekümzükba maparen sadema minyakteter,"

ta aviation agency-i ashiba den tatimtsü ya Pacific tzüküm temeket nung ngutetogo.

Russia kübok Kamchatka peninsula nung Mongolbar anepdang nisung 28 mener passenger tayimtsü ka samaba sülen tesem tulu ka ayimjema bushitsügangdang tenzük.

An-26 tayimtsü ya Kamchatka kübok yimti tongtibangtiba Petropavlovsk-Kamchatsky nungi tzüküm nung aliba Palana jila-i oya aliba mapang 2:40 pm (0240 GMT) nung sama, ta local transport prosecutor's office otongdar Valentina Glazova-i ashi.

"Tekümzükba maparen tang tinyakdak lir," ta lai ashi. "Tang

tashi nung tayimtsü den tesendaktep makai aküm aser tayimtsü anenba tesem nung manentet, ta dang jangjaa lir," ta laisa ashi.

Lai ashiba agi, tayimtsü ya Kamchatka nung local aviation company kati achaayanga liasü. Russia Pacific tzüküm nung Kamchatka peninsula ya alima penzurtemi kanga sapua semdangba tesem ka lir, kong arem shiruru aser live volcanoes aika lir.

Local official temi ashiba agi, passenger tem timba Palana nungi liasü, kong jila tekolakba Olga Mokhiryova densema local sorkar ketdangsür pezü densema liasü.

Bomb yanglutsü merangba atema Hong Kong nung nisung 9 apu

Hong Kong, Chiteni/July 6 (Agencies): Okadak, tunnel aser trash cans tem nung kidang yangluba bomb pokdaksütsü atema tasa asaba atema Hong Kong nung Mongolbarnü secondary school kaketshir trok densema nisung teku puogo.

Police sangdong ka ajanga ashiba agi, taoba küm Beijing-i benokba national security law kübok kiralongrar inyakyim nung shilem agitsü merangba atema temulung melemi item nisungtem apu.

Hong Kong nung ketdangsürtemi iba ozüing amshia yimti nung nungtugu

activists tem puogo, koba 2019 küm yimti nung sokar anemertemi longkak aitba atema telangzüba agütsütsü asoshi yangluba liasü.

Police-isa, iba telok yagi hostel ka nung khen atema amenokba laboratory ka nung explosive triacetone triperoxide mesera TATP yanglutsü meranga liasü, koba Europe nung kanga bulua amshir, ta ashi.


Okadak, cross-harbor tunnel, railway aser yimti nung trash cans tem nung bomb tem amshitsü sentong yanglua liasü ta shia police-i parnok

aitsüogo.

2019 küm sorkar anema longkak aitba sülen Hong Kong police-i TATP yanglurtem aika puogo, kong aonung ka nung nisung 17 apuba den bomb aser chemical tem apuba densema lir.

Mongolbarnü arishi küm 15 nungi 39 tsüingda alir nisung teku puogo, ta Hong Kong Police National Security Department, Senior Superintendent Li Kwai-wah-i ashi.

Kasa mapang nung Hong Kong chief executive Carrie Lam-i azütokshi bener arutsütsü merangba atema nüburtemi aitsütsü imlaba lemsatapa liasü.



Tokyo anüolen Atami, Shizuoka Prefecture kübok Izusan district nung anentsü aliba sülen tekümzükertemi lishi nung rema aliba nisungtem kümzüktsü merangba noksa nung angur. Jila nung anentsüh tulu ka aliba sülen samara alirtem kümzüktsü atema tekümzükertem kanga meranga inyaktepdar.

Imran, Kim Jong nung RSF 'press freedom predators' list nung züngoksemogo

Paris, Chiteni/July 6 (Agencies): Press watchdog Reporters Without Borders (RSF)-i, press nüjiso agintsü merangba state tekolaktem 37 tenüing sangdongogo. Pakistan Ato Kilonser Imran Khan, North Korean dictator Kim Jong-un aser Hungary Ato Kilonser Viktor Orban nung "predators of press freedom" list nung densema lir ta RSG-i ashi.

Bangladesh Ato Kilonser Sheikh Hasina aser Hong Kong administrative chief Carrie Lam nata iba list nung züngoksemogo. Tang mezüingbuba press freedom predators' list nung tetsür lenir züngoksemogo.

Iba list ya Hombarnü sayaa liasü, koba küm pongu lir sayaago. RSF-i tatema iba list 2016 küm sayaa liasü.

RSF-i ashiba agi, lenir 37 rongnung 17 tang mezüingbuba iba list nung züngoksemogo. Item lenirtemi censorship apparatus ka yangluba, ken o junga masadangi osangbenertem tapi agi tepuokdaki yokba aser parnok anema inyaksü rongsemor, ta shia aitsü.

RSF-i linük 19 sentsü temerem agi asükbangtsür lir. Sentsü temerem agi asükbangtsüba ajanga osangbenertem jenjang majungba sayur. Linük 16 sentsü tanak agi asükbangtsüogo aser iba tetezü tensa kanga majung, ta RSF-i ashi.

List nung züngoksema aliba lenirtem indang average ji 66 aser asem nung shilem ka Asia-Pacific tesem nungi lir.

List nung züngoksemertem rongnung Brazil tir Jair Bolsonaro, Myanmar military lenir Min Aung Hlaing, Saudi Arabia crown prince Mohammad bin Salman, Ato Kilonser Narendra Modi, Turkey tir Recep Tayyip Erdogan aser Philippines tir Rodrigo Duterte nung densema lir.

Reporters Without Borders (RSF) tekolakbai linük sorkar balala dang parnok lenritemi osangbenertem anema jenjang agibatem aitsütsü aser independent press kati lokti ajanzüktsü atema inyakba maparentem reprangtetsü merangtsü atema mepeshia metetdaksüogo.

Germany-i linük kar nem tenokdangba agütsür aliba agintsü

Berlin, Chiteni/July 6 (Agencies): Germany-i coronavirus delta variant poteter aliba linüktem rongnung India aser UK den tanga linük asem nem senzüsenpong dak sendakba nung tenokdangba agütsür aliba Hombarnü agintsüogo. Iba corona tashidak tapu tasen ka yagi UK kanga mejungi kongshiogo aser Boris Johnson-i aniba sorkar tetsükdaksü adokdaksüogo.

Tashidak nokdangtsü aser azüoktsü atema amenokba German federal government agency Robert Koch Institute-i, India, Nepal, Russia, Portugal aser UK areas of variant concern" jenjang nung tokja aliba "high-incidence areas" jenjangi anir aluogo, ta ashi. Iba ajanga Germany nung masür senzüsenpongertem nem anisüingzük agütsütsü.

Tang Germany nung benoker aliba temzüing ozüing kübok tashidak tapu tasen pokteter aliba linüktem nungi lisopurtem dak alaker bendangertem linüki aittsü memelar aser lisopurtema vaccine agir liaka hopta ana quarantine südaksür. "High-

incidence areas" jenjang agütsüba ajanga item linüktem nungi Germany-i aitsü melatsü ajisüaka negative teset result sayutsüla aser anogo 10 quarantine asütsü.

Germany-i aoertem dak Covid-19 tashidak mepotetra quarantine mapang ya anogo pongu dang kümdaksütsü akok. Iba inyakyim tasen ya Bodhbarnü nungi benoka inyaksangshitsü.

Kasa mapang nung high-incidence areas nungi arurtem shirnok vaccine tembanga agiogo, parnok quarantine asütsü nungdaka madoker.

German health minister Jens Spahn-i taoba hopta ashiba agi, federal sorkari taruba anogo ishika tsüingda tensa (delta variant agi kongshir aliba linüktem nungi senzüsenpongertem nem temelaba agütsütsü) asadangtsü ta shir liasü.

Vaccine agiba ajanga delta variant kokteter ta ngutetba sülen iba jenjang agia liasü. Taoba ita Dubai-ia, UAE-i agizüker aliba Covid-19 vaccine dose anaprongla agir aliba India nungi arurtem atema tenokdangba agütsür aliba salatsüogo.

Sabangya Compound nung COVID-19 vaccine 100% agiogo



Dimapur, July 6 (TYO): Mokokchung district kübok Sabangya Compound nung sorkari tuyuba ama Covid-19 vaccine agitsü temsüa alir noklang nung shilem shilem (100%) takok ngua agiogo.

Alima ajunga nung Covid-19 wara tenüng agir morok mi

ANFKA ajanga mangyim lemsateper

Dimapur, Chiteni/July 06, 2021 (TYO): ANKFA, President, N. Mar Longkumer tetsü Mrs. Lokokjungla, July 06, 2021 nü iba akümüli nungi pila aoba osang angashia, All Nagaland Kung Fu Association (ANKFA)-i mangyim jashi lemsateper, ta ANKFA sangdong ajanga metetdaksü.

Iba sabang ajanga asür kinungertem den ANKFA-i asükhu lemsateper. Tang ama mangyim aser temulung zürepba mapang, iba tako marok koktetsüsa lai toktsür aoba adianu aser kinunger tem molung sünepjangma aser Tsüngremer kabu ma nung asür tanela tesünep nung anisüngzükdakjang ta sarasademtsür, ta kasa sangdong nung shia lir.

pelar. Ongpangkong South block kübok Sabangya PHC ajanga yim tenet ayimjema repranger. Kongro Dr. Ayangla Saku DIO lai kanga temulong agüja yariba asoshi pelaba metetdaksür, ta parnokisa ashi.

PHC Sabangya nung ketdangsür Dr. Asenla Pongen MO kanga tenendak tenzüker ka aser la den Smti. Amenla Staff nurse, Mr. Lanuangshi Pharmacist, Mr. Tongpang Longchar Lab Asst. staff ajaki tarendak makai teyari agütsüogo.

Maneni, NSRLM ASHA, Anganwadi, SHG, Rev. L. Meren Pastor Sabangya Baptist Arogo, O. Imty Catechist, Catholic Association, Arogo nung tenzüker, Arogotsür ajungai yaritepba asoshi kanga pelar, ta Sabangya Compound yimdeni metetdaksü.

Kanga tenendak yimsüsür Sangpangchang Lkr, EAC O n g p a n g k o n g , Medemchanger Putu Chungtia Council yimyim kübok Sabangya Compound nung Executive Committee Vice Chairman L. Imkong lenisüba den committee achayangba nung neburtemi tashi angaa shilem agiba atema yimdenisa ajak dang pelaba metetdaksüogo.

Wokha DC ajanga metetdaksür

Wokha, Chiteni/July 06, 2021 (TYO): Deputy Commissioner, Wokha, Orenthung Lotha-i sangdong ka ajanga, NH-61 kübok single/intermediate lenmang nung KM 72.40 nungi KM 83.0 tashi 2 lane-road yangluba/ulushiba maparen ajanga kongshir aliba kiojen atema temenok agütsütsü mechi District Level Verification Committee-i inyakyim asadangshiogo, ta metetdaksü.

Anungji, iba maparen ajanga konghsir alir ali kiburtem tenüng indang list ka renemogo. Iba list dak sendakba nung kija/telok kari danga tashishiba mesüra tebilemba kar lira, iba osang sangdongba anogo nungi tenzüka anogo 15 tsünga DC Office nung tezüluba ajanga metetdaksütsüla. Atakzükja aliba anogo süir sülen tashishibatem kecha magizüksü, ta kasa sangdong nung shia lir.



Dimapur, Chiteni/July 06, 2021: Pradhan Mantri Jeevan Jyoti Beema Yojana Scheme atema tangalen nungi arua ayangertem tenüng zülökba yangi noksa nung angur.



Office of the Lakhuni Baptist Arogo

P.O Mangkolemba, Dist: Mokokchung, Nagaland

TENÜNGSANG AGÜTSÜR

Chubawati-er jala **Er. Limanaro** Lakhuni yimti nungi Engineer-in-Chief, menden Government of Nagaland, NPWD nung tongtetba asoshi Lakhuni Baptist Khristar Arogopurtemi la dang pelar aser tenüngsang agütsür. Iba yimli tajung ngutetba asoshi Tsüngrem tenüng tali sentsüwangshidaksür. La mapa agi nüburtem tali temoatsü aser azükaru südakjangta Arogoi sarasademtsür.

Sd/-
(Rev. Moaliba)
Pastor

Sd/-
(M. Bendang Longkumer.)
Secretary

Office of the TULI COLLEGE

Borbora Ward, Tuli Town
Tuli - 798618

The Nagaland University has declared the result of BA Final Year Examination on the 1st of July 2021.

25 students appeared from Tuli College where all 25 of them passed, out of which 7 students has passed in the 1st Position.

Name	Roll No.	Division
General Student :		
1. Wangshisongla	AG 18370020	1st
Education Honours :		
1. Kipangjungba	AH 18370002	1st
2. Temsusenla	AH 18370004	1st
English Honours :		
1. P. Tiasola	AH 18370007	1st
Political Science Honours :		
1. Hosnara Begum	AH 18370010	1st
2. Nungsangtoshi	AH 18370011	1st
3. Temjennenla	AH 18370013	1st

NB: Issue of Marksheets and Provisional Certificates will be notified later after receiving from the Nagaland University.

Sd/-
AK AHMED
Principal, Tuli College

In the Court of Principal District & Sessions Judge

Mokokchung : Nagaland

S/C NO. 109/2021

NOTICE

NOTICE INVITING CLAIMS/OBJECTIONS OF OTHER CLAIMANT(S) FOR ISSUE OF SUCCESSION CERTIFICATE UNDER PART-1 OF INDIAN SUCCESSION ACT 1925

Whereas application under Succession Act 1925 for grant of Succession Certificate for the estate/pension benefits of Late Tongpangmeren has been applied by Smti Imotila w/o Lt. Tongpangmeren R/O H.No 107, Sabangya Compound Mkg. Nagaland for possession of:

GPF, GIS, Gratuity, Leave encashment, Pension etc, Closing of A/c.

Notice is hereby given that any person having interest in the administration of the estate/pension benefits of the said deceased may if she/he so desire appear in this court on or before the said day of 6.8.2021

Given under the hand and seal of the court on this the 6.7.2021

Sd/-
Principal District & Sessions Judge
Mokokchung : Nagaland

Pungro kübok yimtsüngtem nung vaccination drive agi



Kiphire, Chiteni/July 06, 2021: Pungro ADC HQ, Kiphire kübok yimtsüng balala nung vaccination drive agiba mapang, Hakumati yimtsüng nung temsüa alir züngsem ka nem vaccine agütsüba yangi noksa nung angur.

Kiphire, Chiteni/July 06, 2021 (TYO): Mongolbarnü, yimtsüng nungi nisung 4 aser Pungro ADC HQ, Kiphire Mimi yimtsüng nungi nisung 31 kübok yimtsüng balala nung nem vaccine agüja liasü. Kasa vaccination drive ayonga agi, ta mapang, Hakumati yimtsüng sangdong ajanga metetdaksü. nungi temsüa alir nisung 26 nem

Dr. Sato-i anir medical staff vaccine agütsü aser vaccine team kati Likhimro aser Mimi magiba yimtem nung maneni yimtsüng semdang. Iba drive vaccination drive ayongzüksü, agiba mapang, Khonka ta sangdong nung shia lir.

Copa America: Brazil-i Peru koka final-i iogo

Rio de Janeiro, Chiteni/July 06, 2021 (Agencies): Hombarnü, Copa America asayamung mezüng semi final nung, Brazil-i goal 1-0 agi Peru tsükdakja final tongtetogo. Mezüng half sülen, Lucas Paqueta-i Brazil atema goal ka idaktsü, koba asaya ana nung Lucas indang goal tanabuba alitsü.

Asayamung ayonger team - Brazil-i tanabuba semi final, koba Argentina aser Colombia na tsüngda asayatsü, iba asaya nungi takoker team ka den Copa America title atema tokteptsü. Honibarnü, Maracana stadium nung final asayatsü.

Brazil-i Copa America ayongzükba shia, par teloki iba asayamung takok ngua lir aser Hombarnü asaya ajanga, taküm-a parnoki iba asayamung title abentsü asoshi temulungtetba tulu sayuogo.

Iba asaya tenzüker, minute 20 tsüngda Neymar aser Richarlison nati goal idaktsütsü meranga metsüloktsüba goal ana aser Casemiro-i anaben tashi metsüloktsüba goal ana tashi Peru goalkeeper Pedro Gallese-i nokdangteta liasü.

Lucas Paqueta, shibai quarter final nung Brazil atema goal ka idakja team-i goal 1-0 agi Chile tsükdaktsü, semi final nung pai midfield tsütsü shilem tajung agiogo. Brazil-i tasa tajung amshia aser ball junga agütsütepa asaya, saka minute 35buba nungang parnoki goal idaktsütsü maongka angu.

Neymar-i Peru nung asayar asem den meranga toktepa ball bener alu aser pai Paqueta alilen ball ji metsüketa yok, kong goal nungi metre 10 shi pilar noktaka alisang, Paqueta-i aibelen mesü dang Peru keeper adena goal metsüloktsü.

"Iba asaya kanga tasak liasü, onok ajaki kanga meranga asayaogo. Parnok (Peru) ya team tajung ka lir, saka item timtem ajak koka onoki asayatetogo," ta Paqueta-i ashi.

Neymar-i, külem asayar Paqueta nem tenügsang agüja liasü aser taruba asaya nung pai junga asaya telok nungitsü, ta ashi. "Paqueta ya asayar tajung ka aser match balala nung pa asaya arudang, tajungba kümdar. Tan season nung club atema pai shilem tajung agiogo aser Copa

America asayamung nunga, Brazil atema pa asayar tongtibang ka asütsü ta pa asaya sempet ajanga sayuogo," ta Neymar-i shisem.

Mezüng half tashi, Brazil puri goal idaktsüba den külemi Peru pur amokbangba asaya liasü, saka tanabuba half nung par telok tera anüalema kümadok, kong break sülen Marcos Lopez aser Raziël Garcia na anioka asayaba ajanga Peru pur saksalemdaktsü.

Brazil pur den goal agi meneptepa asayatsü asoshi, 2019 küm Copa America asayamung semi final nung tamakok angur telok - Peru-i goal idaktsütsü merang, kong Gianluca Lapadula-i metsüloktsüba goal ka Ederson-i nokdangteta. Iba sülen, team pur atema Ederson-isa meranga Peru pur goal ishilen nokdangteta asaya.

Tanabuba half nung Peru team-i Brazil pur den meneptepa asaya, saka parnoki goal ka danga meinoktsütsü asaya tembang. Kasa mapang, semi-final asaya densema Brazil puri asaya 13 tashi atonga takok angur alitsü.

Wimbledon: Karolina semi-final-i iogo

London, Chiteni/July 06, 2021 (Agencies): Mongolbarnü, Wimbledon asayamung tetsür kija quarter final asaya nung, Karolina Pliskova-i Switzerland tsür Viktorija Golubic madak 6-2, 6-2 agi takok anguba sülen, lai tan Wimbledon nung mezüng semi-final tongtetogo.

Taoba mapang, world no. 1 Pliskova, shiba tang rank 13 nung lir, Honibarnü final asayatsü atema lai Belarus tsür Aryna Sabalenka den semifinal asayatsü.

Asaya tanga ka nung, Aryna Sabalenka-i 6-4, 6-3 agi Ons Jabeur koka semi-final-i iogo.

Pliskova-i Grand Slam title khen danga kokdanga mali. 2016 küm US Open final nung lai runners-up jenjang ajangzükta.

"Wimbledon nung mezüngbuba semi final kokteta asayaba atema pelaseter," ta arishi küm 29 tain Czech tsür Karolina-i ashi.

Grand Slam semi-final pezübuba nung Karolina asayatsü terenemba lir.

2019 Australian Open asayamung nung lai major semi-final nung tesüsa shilem agia liasü.

"Taküm 'Court One' nung mezüng shilem agir alitsü aser

iba title ajangzükta atema kanga meranga asayatsü. Iba asayamung tenzüker külen nungi match shia nung tajungba melenshia asaya arur ama bilemer," ta lai shisem.

Taküm Wimbledon nung, Pliskova-i set ka nung danga tamakok mengui asaya arudar.

"Taruba asaya atema ni tajungba renemer asayatsü aser iba tanela nung maneni asaya yonga aotsü imlar," ta laisa ashi.

Kasa asayamung tetsür kija quarter final asaya tanga ka nung, Angelique Kerber-i Karolina Muchova madak 6-2, 6-3 agi takok ngua semifinal tongtogo.

David Warner-i Williamson nem tenügsang agütsü



David Warner & Kane Williamson (file)

New Delhi, Chiteni/July 06, 2021 (Agencies): Kane Williamson-i aniba team - New Zealand-i Bodhbarnü, World Test Championship (WTC) title mezüng takok ngua otsü yangluogo.

Southampton kübok 'The Ageas Bowl' nung ayonga asayaba WTC final nung New Zealand-i India tsükdakja iba asayamung kokogo. New Zealand puri iba Test asayamung takok anguba osang angashia, Brehostibarnü,

Williamson indang SunRisers Hyderabad (SRH) team nung külemi asayar aser taoba mapang Australia vice-captain David Warner-i Kiwis team nem tenügsang agütsü.

Ano külen, India captain Virat Kohli-i meranga asayaba atema, Warner-i pa nem tenügsang agüja liasü.

"Tsügsang mopung mejungaka, iba asayamung nung takoker ka liasü aser iba team ji New Zealand liasü. Test cricket atema iba asayamung

jangratemtsüka asayaogo," ta Warner-i lemsatöp.

Warner-i lemsatöp post' nung Williamson aser Virat Kohli indang noksa dena lir.

"WTC takok angutsü atema Kane Williamson aser par team-i junga asayaogo," ta Warner-i shisem.

Iba asaya tanabuba innings nung, takok angutsü atema New Zealand pur run 139 nüngdaka liasü, kong Williamson-i ball 89 nung run 52 yanglu aser timtem kecha melii par teloki iba asaya koktet. Williamson den yarisema Ross Taylor-ia ball 100 nung run 47 bendenloktsü.

2015 aser 2019 küm '50-over' World Cup final ana tashi nung atonga tamakok anguba sülen, New Zealand-i WTC takok marok anguba ajanga International Cricket Council (ICC) nung parnoki jenjang tuluka ajangzükta.

Dhawan-i anir India team pur training tenzükgogo

Colombo, Chiteni/July 06, 2021 (Agencies): July 13, 2021 nungi Sri Lanka team den limited over series asaya tenzüksü lia, Hokolbarnü India cricket team pur mezüng training session tenzükgogo.

India, shirnoki iba series atema team tanabuba shim, Hombarnü parnok Colombo tonga aru aser parnok anenzükba tesem nung asayar ajak pei pei takdang nung anogo asem tashi quarantine' süogo. Ano külen, India Test team pur UK nung mungdar.

Sri Lanka series atema senior batsman Shikhar Dhawan captain shimogo aser team coach ji, NCA head Rahul Dravid alitsü.

October-November nung T20 World Cup metenzükdang, iba series ya India indang tour tatembuba alitsü. Iba squad nung asayar tasen trok - Chetan Sakariya, K Gowtham, Nitish Rana, Devdutt Padikkal, Varun Chakaravarth aser Rituraj

Gaekwad nung dena lir.

Prithvi Shaw, Ishan Kishan, Sanju Samson aser Suryakumar Yadav nung World Cup squad nung adentsü asünung, iba series ya parnok atema kanga tongtibang alitsü.

Iba tour nung, India team-i ODIs asem aser T20Is asayatsü. India squad nung Shikhar Dhawan (Captain), Prithvi Shaw, Devdutt Padikkal, Rituraj Gaikwad, Suryakumar Yadav, Manish Pandey, Hardik Pandya, Nitish Rana, Ishan Kishan (wicket-keeper), Sanju Samson (wicket-keeper), Yuzvendra Chahal, Rahul Chahar, K Gowtham, Krunal Pandya, Kuldeep Yadav, Varun Chakravathy, Bhuvneshwar Kumar (Vice-captain), Deepak Chahar, Navdeep Saini aser Chetan Sakariya nung dena lir.

Net Bowler temji Ishan Porel, Sandeep Warrier, Arshdeep Singh, Sai Kishore aser Simarjeet Singh nung alitsü.

Delhi sorkari Covid agi... (Tapak 7 nungi...)

Parnok kuli kaketem nung aibelen tepu, parnok mepelai tetoktsü, parnok ajungshiang. Item kibongtem nem takaratiba nung senotsü teyari agütsütsü," ta Kejriwal-i ashi.

Delhi sorkar, Department of Social Welfare-i, Mukhyamantri Covid-19 Pariwar Aarthik Sahayata Yojana' ya June 22 nü sangdonga liasü. Sangdong nung, "sorkari tashidak agi kongshir aliba kibongtem nungi züngsem ka civil defence volunteer nung züngoksemtsü atema asadangtsü. Iba dak alia tang benoka aliba inyakyim dak ajemdaker tanurtem health aser education tenügdakba peridaktsütsü atema state-i inyaktsü," ta shia lir.

"Asür aser pa/la dak metaloker alir anaprongla Delhi

nung alir asütsüla. Tasüba ya Covid-19 agi asüba mesera Covid poteter ita ka tsüngda asüba ya kuli agütsütsüla aser health department-i Covid agi asüba ta jangjatsütsüla," ta sangdong nung shia lir.

May 18 nü Kejriwal-i, "Covid agi asür kibongtem ajak nem ex gratia sen 50,000 agütsütsü," ta shiogo. "Kibong kar nungbo kibong mesür Covid-19 agi süogo. Item kibongtem nem ex gratia sen 50,000 dak alia ano ita shia sen 2,500 agütsütsü," ta pai ashi.

Covid-19 tashidak agi tsürapur anaprongla sür aliba tanurtem ajak nem pa/la arishi küm 25 majung tashi ita shia sen 2,500 agütsütsü. Delhi sorkarisa parnok nem angati education agütsütsü.

Union minister Thaawarchand... (Tapak 7 nungi...)

Tir Ram Nath Kovind-isa, Hari Babu Kambhampati aser Rajendra Vishwanath Arlekar na Mizoram aser Himachal Pradesh Angh asütsü shimba agizükogo, ta kasa sangdong ajanga metetdaktsü.

Goa nung BJP lenir aser taoba mapang Speaker Arlekar-i Bandaru Dattatraya melentsü shiba Haryana Angh asütsü shimogo. Arlekar ya Goa nung rongnungi mezüngbuba Angh lir. "Onok lenir aser taoba Goa Assembly Speaker aser Ex Minister Rajendra Arlekar Himachal Pradesh Angh asütsü shimba atema pa nem tenügsang agütsür. Iba ya Goa nung ajak atema

nemadangtsü mapang ka lir, kechiyong Arlekar ya Goa nung rongnungi iba mapa asoshi mezüngbuba shimogo," ta Goa chief minister Pramod Sawant-i tweet asü.

Andhra Pradesh nungi BJP lenir Kambhampati-i, PS Sreedharan Pillai melentsü shiba Goa Angh asütsü shimogo, ta sangdong ajanga metetdaktsü. Haryana Angh Satyadev Narayan Arya, Tripura Angh asütsü shimogo.

Kasa sangdong ajanga ashiba agi, Tripura Angh Ramesh Bais transfer sütsüogo aser Droupadi Murmu melena Jharkhand Angh asütsü shimogo.

BILEMDANGANG

"Temedan o aika jembidang tai tuluba menar."